

182. NC. 94.8.4.

যুক্তির উপায়

রবীন্দ্রনাথ ঠাকুর



বিশ্বভারতী গ্রন্থালয়
বঙ্কিম চ্যাট্জে স্ট্রীট, কলিকাতা

অলকা পত্রে প্রকাশিত, আশ্বিন ১৩৪৫
গ্রন্থাকারে প্রকাশিত: শ্রাবণ ১৩৫৫

প্রকাশক শ্রীপুলিনবিহারী সেন
বিশ্বভারতী, ৬৩ দ্বারকানাথ ঠাকুর লেন, কলিকাতা

মুদ্রাকর শ্রীমূৰ্খনারায়ণ ভট্টাচার্য
তাপসী প্রেস, ৩০ কর্নওয়ালিস স্ট্রীট, কলিকাতা

ভূমিকা

ফকির, স্বামী অচ্যুতানন্দের চেলা। গৌফদাড়িতে মুখের বারো আনা অনাবিজ্ঞত। ফকিরের স্ত্রী হৈমবতী। বাপের আদরের মেয়ে। তিনি টাকা রেখে গেছেন ওর জন্তে। ফকিরের বাপ বিশ্বেশ্বর পুত্রবধূকে স্নেহ করেন, পুত্রের অপরিমিত গুরুভক্তিতে তিনি উৎকণ্ঠিত।

পুষ্পমালা এম. এ. পরীক্ষায় সংস্কৃতে প্রথম শ্রেণীতে প্রথম হওয়া মেয়ে। দূরসম্পর্কে হৈমর দিদি। কলেজি খাঁচা থেকে ছাড়া পেয়ে পাড়গাঁয়ে বোনের বাড়িতে সংসারটাকে প্রত্যক্ষ দেখতে এসেছে। কৌতূহলের সীমা নেই। কৌতূকের জিনিসকে নানা রকমে পরখ করে দেখছে কখনো নেপথ্যে, কখনো রঙ্গভূমিতে। ভারি মজা লাগছে। সকল পাড়ায় তার গতিবিধি, সকলেই তাকে ভালোবাসে।

পুষ্পমালার একজন গুরু আছেন, তিনি খাঁটি বনস্পতি জাতের। অগুরু-জঙ্গলে দেশ গেছে ছেয়ে। পুষ্পর ইচ্ছে সেইগুলোতে হাসির আগুন লাগিয়ে খাণ্ডবদাহন করে। কাজ গুরু করেছিল এই নবগ্রামে। শুনেছি, বিয়ে হয়ে যাওয়ার পর পুণ্যকর্মে ব্যাঘাত ঘটেছে। তার পর থেকে পঞ্চশরের সঙ্গে হাসির শর যোগ করে ঘরের মধ্যেই সুমধুর অশাস্তি আলোড়িত করেছে। সেই প্রহসনটা এই প্রহসনের বাইরে।

পাশের পাড়ার মোড়ল ঘণ্টীচরণ। তার নাতি মাখন
দুই ত্রীর তাড়ায় সাত বছর দেশছাড়া। ঘণ্টীচরণের বিশ্বাস
পুষ্পর অসামান্য বশীকরণ-শক্তি। সেই পারবে মাখনকে
ফিরিয়ে আনতে। পুষ্প শুনে হাসে আর ভাবে, যদি
সম্ভব হয় তবে প্রহসনটাকে সে সম্পূর্ণ করে দেবে। এই
নিয়ে রবি ঠাকুর নামে একজন গ্রন্থকারের সঙ্গে মাঝে
মাঝে সে পত্রব্যবহার করেছে।

মুক্তির উপায়

প্রথম দৃশ্য

ফকির । পুষ্পমালা । হৈমবতী

ফকির

সোহং সোহং সোহং ।

পুষ্প

ব'সে ব'সে আওড়াচ্ছ কী ।

ফকির

গুরুমন্ত্র ।

পুষ্প

কতদূর এগোলো ।

ফকির

এই, ইড়া নাড়ীটার কাছ পর্যন্ত এসে গেল থেমে ।

পুষ্প

হঠাৎ থামে কেন ।

ফকির

ঐ আমার ছিঁচকাঁহনি খুকিটার কীর্তি । মন্তুরটা
গুরগুর গুরগুর করতে করতে দিব্যি উঠছিল উপরের
দিকে ঠেলে । বোধ হয় আর সিকি ইঞ্চি হলেই পিঙ্গলার
মধ্যে ঢুকে পড়ত, এমন সময় মেয়েটা নাকিসুরে চীৎকার

করে উঠল— বাবা, নচক্স্‌। দিলুম ঠাস করে গালে এক
চড়, ভ্যা করে উঠল কেঁদে, অমনি এক চমকে মন্তুরটা নেমে
পড়ল পিঙ্গলার মুখ থেকে একেবারে নাভিগহ্বর পর্যন্ত।
সোহং ব্রহ্ম, সোহং ব্রহ্ম।

পুষ্প

তোমার গুরুর মন্তুরটা কি অজীর্ণরোগের মতো।
নাড়ীর মধ্যে গিয়ে—

ফকির

হাঁ দিদি, নাড়ীর মধ্যে ঘুটঘাট ঘুটঘাট করছেই— ওটা
বায়ু কিনা।

পুষ্প

বায়ু নাকি।

ফকির

তা না তো কী। শব্দব্রহ্ম— ওতে বায়ু ছাড়া আর
কিছুই নেই। ঋষিরা যখন কেবলই বায়ু খেতেন তখন
কেবলই বানাতেন মন্তুর।

পুষ্প

বল কী।

ফকির

নইলে অতটা বায়ু জমতে দিলে পেট যেত ফেটে।
নাড়ী যেত পটপট করে ছিঁড়ে বিশখানা হয়ে।

পুষ্প

উঃ, তাই তো বটে— একেবারে চার-বেদ-ভরা মন্ত্র—
কম হাওয়া তো লাগে নি।

ফকির

শুনলেই তো বুঝতে পার, ঐ-যে ও—মু, ওটা তো
নিছক বায়ু-উদগার। পুণ্যবায়ু, জগৎ পবিত্র করে।

পুষ্প

এত সব জ্ঞানের কথা পেলে কোথা থেকে। আমরা
হলে তো পাগল হয়ে যেতুম।

ফকির

সবই গুরুর মুখ থেকে। তিনি বলেন, কলিতে গুরুর
মুখই গোমুখী— মন্ত্রগঙ্গা বেরচ্ছে কল্কল করে।

পুষ্প

বি. এ.-তে সংস্কৃতে অনাস্ নিয়ে খেটে মরেছি
মিথ্যে। অজীর্ণ রোগেও ভুগেছি, সেটা কিন্তু পাকযন্ত্রের,
ইড়াপিঙ্গলার নয়।

ফকির

এতেই বুঝে নাও— গুরুর কৃপা। তাই তো আমার
নাড়ীর মধ্যে মন্ত্ররটা প্রায়ই ডাক ছাড়ে গুরু গুরু
গুরু শব্দে।

পুষ্প

আচ্ছা, ডাকটা কি আহারের পরে বাড়ে।

ফকির

তা বাড়ে বটে।

পুষ্প

গুরু কী বলেন।

ফকির

তিনি বলেন পেটের মধ্যে স্থূলে সূক্ষ্ম লড়াই, যেন দেবে দৈত্যে। খাত্তের সঙ্গে মস্তুর বেধে যায় যেন গোলাগুলি-বর্ষণ, নাড়ীগুলো উচ্চস্বরে গুরুকে স্মরণ করতে থাকে।

হৈয়

দ্রুতের কথা আর কী বলব দিদি, পেটের মধ্যে গুরুর স্মরণ চলছে, বাইরেও বিরাম নেই। চরণদাস বাবাজি আছেন ওঁর গুরুভাই, সে লোকটার দয়ামায়া নেই, ওঁকে গান শেখাচ্ছেন। . পাড়ার লোকেরা—

পুষ্প

চুপ চুপ চুপ, পতিব্রতা তুমি। স্বামীর কণ্ঠ যখন চলে, সাক্ষীরা প্রাণপণে থাকেন নীরবে। ফকিরদা, গলায় গান শানাচ্ছ কেন, গাঙ্গিজির অহিংসানীতির কথা শোন নি।

হৈম

তোমরা দুজনে তব্বকথা নিয়ে থাকো । আমাকে যেতে
হবে মাছ কুটতে । আমি চললুম ।

প্রস্থান

ফকির

আমার কথাটা বুঝিয়ে বলি । গুরুর মন্ত্ৰ, যাকে বলে
গুরুপাক । খুব বেশি যখন জমে ওঠে অন্তরে, তখন সমস্ত
শরীরটা ওঠে পাক দিয়ে ; নাচের ঘূর্ণি উঠতে থাকে পায়ের
তলা থেকে উপরের দিকে ; আর ঘানি ঘুরলে যেরকম
আওয়াজ দিতে চায়, ভক্তির ঘোরে সেইরকম গানের
আওয়াজ ওঠে গলার ভিতর দিয়ে । এই দেখো-না এখনি
সাধনার নাড়া লেগেছে একেবারে মূলাধার থেকে— উঃ !

পুষ্প

কী সর্বনাশ ! ডাক্তার ডাকব নাকি ।

ফকির

কিছু করতে হবে না । একবার পেট ভরে নেচে নিতে
হবে । গুরু বলেছেন, গুরুর মন্ত্ৰটা হল ধারক, আর
নৃত্যটা হল সারক, দুটোরই খুব দরকার ।

উঠে দাঁড়িয়ে নৃত্য

গুরুচরণ করো শরণ-অ

ভবতরঙ্গ হবে তরণ-অ

সুধাক্ষরণ প্রাণভরণ-অ

মবণভয় হবে হরণ-অ ।

পুষ্প

শুধু মরণভয়-হরণ নয়, দাদা । গুরুদক্ষিণার চোটে
স্ত্রীব গয়না, বাপেব তহবিল -হরণও চলছে পুরো দমে ।

ফকির

ঐ দেখো, বাবা আসছেন বৌকে নিয়ে । বড়ো
ব্যাঘাত, বড়ো ব্যাঘাত । গুবো ।

পুষ্প

ব্যাঘাতটা কিসের ।

ফকির

স্থূলরূপে ওঁরা আমাকে ফকির বলেই জ্ঞানেন ।

পুষ্প

আরো একটা রূপ আছে নাকি ।

ফকির

ক্ষয় হয়ে গেছে আমার ফকির-দেহটা ভিতরে ভিতরে ।
কেবলই মিলে যাচ্ছে গুরুদেহের সূক্ষ্মরূপে । বাইরে পড়ে
আছে খোলসটা মাত্র । ওঁরা আসলটাকে কিছুতেই
দেখবেন না ।

পুষ্প

খোলসটা যে অত্যন্ত বেশি দেখা যাচ্ছে । একেবারেই
স্বচ্ছ নয় ।

ফকির

দৃষ্টিশুদ্ধি হতে দেরি হয় । কিন্তু সব আগে চাই
বিশ্বাসটা । ভগবৎ-রূপায় এঁদের মনে যদি কখনো বিশ্বাস
জাগে, তা হলে গুরুদেহে আর ফকিরের দেহে একেবারে
অভেদ রূপ দেখতে পাবেন— তখন বাবা—

পুষ্প

তখন বাবা গয়ায় পিণ্ডি দিতে বেরবেন ।

ফকিরের প্রস্থান । বিশ্বেশ্বর ও হৈমবতীর প্রবেশ

বিশ্বেশ্বর

হৈমর প্রতি

বেয়াই ব্যাঙ্কে তোমার নামে কিছু টাকা রেখে
গেছেন । ফকির সেটা জানে, তাই তো ওর কিছু হল না ।

পুষ্প

আর কী হলে আর কী হত, সে ভাবতে গেলে মাথা
ধরে যায় ।

বিশ্বেশ্বর

ম্যাকিননের হেড্‌বাবু আমার বন্ধুর শ্রালীপতি, সে

বলেছিল, ফকির যা-হয় একটা কিছু পাস করলেই তাকে এসিস্টেন্ট স্টোরকীপার করে দেবে। বাঁদরটা কেবল জেদ করেই বারে বারে ফেল করতে লাগল।

পুষ্প

ফেল করবার বিশ্রী জেদ আরো অনেক ছেলের দেখেছি। মিস্ত্রীদের বাড়ির মোতিলাল আমার সঙ্গে একসঙ্গেই পড়া আরম্ভ করেছিল। ম্যাট্রিকের এ-পারেব খোঁটা এমনি বিষম জেদ করে ঝাঁকড়িয়ে রইল, ওর পিসেমশায় ওর কানে ধরে ঝিক্কে মারতে মারতে কান প্রায় ছিঁড়ে দিলেন কিন্তু পাস করতে পারলেন না। চল্ ভাই হৈমি, পড়া করবি আয়—স্বামীর হয়ে পাস করার কাজটা তুই সেরে রাখবি চল্।

বিশ্বেশ্বর

যাও পড়তে, কিন্তু শোনো মা—ফকির টাকা চাইলেই তুমি ওকে দাও কেন।

হৈম

কী করব বাবা, টাকা টাকা করে উনি বডো অশান্তি বাধান।

বিশ্বেশ্বর

ঐ দেখো-না, একটা রৌওয়া-ওঠা বাঘের চামড়ার

উপর বসে বিড়বিড় করে বকছে। এই ফকির, শুনে যা,
বাঁদর। শুনে যা বলছি।

পুষ্প

মেসোমশায়, তোমার বুঝি সাহস হয় না ওকে ওর
গাঙিটা থেকে টেনে আনতে!

বিশ্বেশ্বর

সত্যি কথা বলি, মা, ভয়-ভয় করে। ওর সব মস্তুর-
তন্তুর ঠিক যে মানি তাও নয়, আবার না-মানবার মতো
বুকের পাটাও নেই। দেখো-না, ওখানটায় কিরকম খুদে
পাগলা-গারদ সাজিয়েছে। গুরু কবে পাঁঠা খেয়েছিল,
তার মুড়োর খুলিটা রেখেছে পশমের আসনে।

পুষ্প

ঐ জায়গাটাকে ও নাম দিয়েছে মোক্ষধাম। গুরুর
সিগারেট-থাওয়া দেশলাই-কাঠিগুলো কাটা কাঁচকলার
টুকরোর উপর পুঁতে পুঁতে গাঙি বানিয়েছে। ও বলে,
কাঠিগুলোর আলো কিছুতেই নেবে না, যার দিব্যদৃষ্টি
আছে সে চোখ বুজলেই দেখতে পায়। গুরুর একটা
চা-সেটের ভাঙা পিরিচ এনেছে, সেটার প্রতিষ্ঠা হয়েছে
গুরুর বর্মা চুরুটের প্যাকবাক্সে। গুরু ভালোবাসেন সাড়ে
আঠারো ভাজা, কিনে এনে নৈবেদ্য দেয় ঐ পিরিচ ভরে।
বলে, ঐ পিরিচে যে পেয়ালা ছিল এক কালে, তার

অদৃশ্যরূপ গুরুর অদৃশ্য প্রসাদ ঢালতে থাকে । মোক্ষধাম
ভরে যায় দার্জিলিং-চায়ের গন্ধে ।

বিশ্বেশ্বর

আচ্ছা মা, ঐ বড়ো বড়ো বোতলগুলো কী করতে
সাজিয়ে রেখেছে ! ওর মধ্যে গুরুর ফীভার-মিক্‌চারের
অদৃশ্যরূপ ভরে রেখেছে নাকি !

পুষ্প

বল্-না হৈমি, ওগুলো কিসের জন্তে ।

হৈম

দক্ষিণা পেলেই গুরু তালপাতার উপর গীতার শ্লোক
লিখে সেগুলো জল দিয়ে ধুয়ে দেন । গীতা-ধোওয়া জলে
ঐ বোতলগুলো ভরা । তিন সন্ধে স্নান করে তিন চুমুক
করে খান । ওঁর বিশ্বাস, ওঁর রক্তে গীতার বন্তা বয়ে
যাচ্ছে । আমার সংসার-খরচের দশ টাকার পাঁচখানা
নোট ঐ বন্তায় গেছে ভেসে । যাই, আমার কাজ
আছে ।

প্রস্থান

বিশ্বেশ্বর

ওরে ও ফক্রে !

পুষ্প

আচ্ছা, আমি ওকে নিয়ে আসছি ।

কাছের দিকে গিয়ে ব্যস্ত হয়ে

ও ফকিরদা, করেছ কী ।

ফকির

কেন, কী হয়েছে ।

পুষ্প

গুরু হাঁসের ডিমের বড়া খেয়েছিলেন, তার খোলাটা
পড়ে গেছে তোমাব চাদর থেকে বাবান্দার কোণে ।

ফকির

লাফ দিয়ে উঠে

এঃ, ছি ছি, করেছি কী !

পুষ্প

হতভাগা হাঁসটাকে পর্যন্ত বঞ্চিত করলে তুমি ! সে
তোমার পিছনে পিছনে প্যাক প্যাক করতে করতে যেত
বৈকুণ্ঠধামে— সেখানে পাড়ত স্বর্গীয় ডিম ।

ফকির

বেরিয়ে এসে খোলাটা নিয়ে বারবার মাথায় ঠেকালে

ক্ষমা করো গুরু ক্ষমা করো—এ অণু জগদ্ব্রহ্মাণ্ডের
বিগ্রহ ; এর মধ্যে আছে চন্দ্র সূর্য, আছে লোকপাল
দিকপালরা সবাই । গঙ্গাজল দিয়ে ধুয়ে আনিগে ।

পুষ্প

চাদর চেপে ধ'রে

এনো, এখন তোমার বাবার কথাটা শুনে নাও ।

চান্দরের খুঁটে ডিম বেঁধে ফকির বিশ্বেশ্বরকে প্রণাম করলে

বিশ্বেশ্বর

বাপু, ভক্তিটা খাটো করে আমার উক্তিটা মানো।

ফকির

কী আদেশ করেন।

বিশ্বেশ্বর

আর-একবার পাস করবার চেষ্টা করে দেখো।

ফকির

পারব না বাবা।

বিশ্বেশ্বর

কী পারবি নে। পাস করতে, না, পাস করবার চেষ্টা
করতে ?

ফকির

চেষ্টা আমার দ্বারা হবে না।

বিশ্বেশ্বর

কেন হবে না।

ফকির

গুরুজি বলেন, পাশ শব্দের অর্থ বন্ধন। প্রথমে পাস,
তার পরেই চাকরি।

বিশ্বেশ্বর

লক্ষ্মীছাড়া! কী করে চলবে তোমার! আমার
পেন্সনের উপর? আমি কি তোমাকে খাওয়াবার জন্তে

অমর হয়ে থাকব । একটা কথা জিজ্ঞাসা করি— বোম্বার
কাছে টাকা চাইতে তোর লজ্জা করে না ? পুরুষমানুষ
হয়ে স্ত্রীর কাছে কাঙালপনা !

ফকির

আমি নিজের জন্তে এক পয়সা নিই নে ।

বিশ্বেশ্বর

তবে নিস কার জন্তে ।

ফকির

ওঁরই সদগতির জন্তে ।

বিশ্বেশ্বর

বটে ? তার মানে ?

ফকির

আমি তো সবই নিবেদন করি গুরুজির ভোগে । তার
ফলের অংশ উনিও পাবেন ।

বিশ্বেশ্বর

অংশ পাবেন বটে ! উনিই ফল পাবেন আঁঠিমুদ্র ।
ছেলেপুলেরা মরবে শুকিয়ে ।

ফকির

আমি কিছুই জানি নে ।

দীর্ঘনিশ্বাস ফেলে

যা করেন গুরু ।

বিশ্বেশ্বর

বেরো, বেরো আমার সামনে থেকে লক্ষ্মীছাড়া বাদর ।
তোর মুখ দেখতে চাই নে ।

প্রস্থান । হৈমবতীর প্রবেশ

ফকির

কা তব কাস্তা—

হৈম

কী বকছ ।

ফকির

কা তব কাস্তা । কোন্ কান্তা হয় ।

হৈম

হিন্দুস্থানী ধবেছ ? বাংলায় বলো ।

ফকির

বলি, কাঁদছে কে ।

হৈম

তোমারই মেয়ে মিন্তু ।

ফকির

হায় বে, একেই বলে সংসার । কাঁদিয়ে ভাসিয়ে
দিলে ।

হৈম

কাকে বলে সংসার ।

ফকির

তোমাকে ।

হৈম

আর, তুমি কী ! মুক্তির জাহাজ আমার ! তোমরা
বাঁধ না, আমরাই বাঁধি !

ফকির

গুরু বলেছেন, বাঁধন তোমাদেরই হাতে ।

হৈম

আমি তোমাকে যদি বেঁধে থাকি সাত পাকে, তোমার
গুরু বেঁধেছেন সাতান্ন পাকে ।

ফাকর

মেয়েমানুষ— কী বুঝবে তুমি তত্ত্বকথা ! কামিনী
কাঞ্চন—

হৈম

দেখো, ভগুমি কোরো না । কাঞ্চনের দাম তোমার
গুরুজি কতখানি বোঝেন সে আমাকে হাড়ে হাড়ে বুঝিয়ে
দিয়েছেন । আর, কামিনীর কথা বলছ ! ঐ মুখ
কামিনীগুলোই পায়ের ধুলো নিয়ে পায়ে কাঞ্চন যদি না
ঢালত তা হলে তোমার গুরুজির পেট অত মোটা হত

না। একটা খবর তোমাকে দিয়ে রাখি। এ বাড়ি থেকে
একটা মায়া তোমার কাটবে। কাঞ্চনের বাঁধন খসল
তোমার। স্বপ্নরমণায় আমাকে দিব্যি গালিয়ে নিয়েছেন,
আমার মাসহারা থেকে তোমাকে এক পয়সাও আর দিতে
পারব না।

পুষ্পর প্রবেশ

পুষ্প

ফকিরদা! মানে কী। তোমার শোবাব ঘর থেকে
পাওয়া গেল মাণ্ডুক্যোপনিষৎ! অনিদ্ভার পাঁচন নাকি!

ফকির

ঈশৎ হেসে

তোমরা কী বুঝবে— মেয়েমানুষ!

পুষ্প

কৃপা করে বুঝিয়ে দিতে দোষ কী!

ফকির হাস্তমুখে নীরব

হৈম

কী জানি ভাই, ওখানা উনি বালিশের নিচে রেখে
রাস্তিরে ঘুমোন।

পুষ্প

বেদমন্ত্ৰগুলোকে তলিয়ে দেন ঘুমের তলায়। এ বই
পড়তে গেলে যে তোমাকে ফিরে যেতে হবে সাতজন্ম পূর্বে।

ফকির

গুরুকৃপায় আমাকে পড়তে হয় না ।

পুষ্প

ঘুমিয়ে পড়তে হয় ।

ফকির

এই পুঁথি হাতে তুলে নিয়ে তিনি এর পাতায় পাতায় ফুঁ দিয়ে দিয়েছেন, জলে উঠেছে এর আলো, মলাট ফুঁড়ে জ্যোতি বেরতে থাকে অক্ষরের ফাঁকে ফাঁকে, চুকতে থাকে স্রষ্মা নাড়ীর পাকে পাকে ।

পুষ্প

সেজন্তে ঘুমের দরকাব ?

ফকির

খুবই । আমি স্বয়ং দেখেছি গুরুজিকে, দুপুরবেলা আহারের পর ভগবদগীতা পেটের উপর নিয়ে চিৎ হয়ে পড়ে আছেন বিছানায়— গভীর নিদ্রা । বারণ করে দিয়েছেন সাধনায় ব্যাঘাত করতে । তিনি বলেন, ইড়াপিঙ্গলার মধ্য দিয়ে শ্লোকগুলো অন্তরাহ্মায় প্রবেশ করতে থাকে, তার আওয়াজ স্পষ্ট শোনা যায় । অবিশ্বাসীরা বলে, নাক ডাকে । তিনি হাসেন ; বলেন, মূঢ়দের নাক ডাকে, ইড়াপিঙ্গলা ডাকে জ্ঞানীদের— নাসারন্ধ্র আর ব্রহ্মরন্ধ্র ঠিক এক রাস্তায়, যেন চিৎপুর আর চৌরঙ্গী ।

পুষ্প

ভাই হৈমি, ফকিরদার ইড়াপিঙ্গলা আজকাল কী রকম
আওয়াজ দিচ্ছে।

হৈম

খুব জোরে। মনে হয়, পেটের মধ্যে তিনটে চারটে
ব্যাঙ মরীয়া হয়ে উঠেছে।

ফকির

ঐ দেখো, শুনলে পুষ্পদিদি! আশ্চর্য ব্যাপার! সত্যি
কথা না জেনেই মুখ দিয়ে বেরিয়ে পড়েছে। গুরুজি বলে
দিয়েছেন, মাণ্ডুক্য উপনিষদের ডাকটাই হচ্ছে ব্যাঙের
ডাক। অন্তরাশ্রা চরম অবস্থায় নাভিগহ্বরে প্রবেশ করে
হয়ে পড়েন কৃপমধুক, চার দিকের কিছুতেই আর নজর
পড়ে না। তখনি পেটের মধ্যে কেবলই শিবোহং শিবোহং
শিবোহং করে নাড়ীগুলো ডাক ছাড়তে থাকে। সেই
ঘুমেতে কী গভীর আনন্দ সে আমিই জানি— যোগনিদ্রা
একেই বলে।

হৈম

একদিন মিস্ত্র কেঁদে উঠে ওঁর সেই ব্যাঙডাকা ঘুম
ভাঙিয়ে দিতেই তাকে মেরে খুন করেন আর কি।

পুষ্প

ফকিরদা, সংস্কৃতে অনাস নিয়েছিলুম, আমাকে পড়তে

হয়েছিল মাণ্ডুক্যের কিছু কিছু। নাকের মধ্যে গোলমরিচের
গুঁড়ো দিয়ে হেঁচে হেঁচে ঘুম ভাঙিয়ে রাখতে হত। হাঁচির
চোটে নিরেট ব্রহ্মজ্ঞানের বারো আনা তরল হয়ে নাক
দিয়েই বেরিয়ে গিয়েছিল। ইড়াপিঙ্গলা রইল বেকার
হয়ে। অভাগিনী আমি, গুরুর ফুঁয়ের জোরে অজ্ঞানসমুদ্র
পার হতে পারলেম না।

ফকির

ঈশং হেসে

অধিকারভেদ আছে।

পুষ্প

আছে বই কি। দেখে-না, ঐ শাস্ত্রেই ঋষি কোন্-
এক শিষ্যকে দেখিয়ে বলেছেন, সোহয়মাশ্বা চতুষ্পাৎ—এর
আত্মাটা চার-পা-ওয়ালা। অধিকারভেদকেই তো বলে
ছ-পা চার-পায়ের ভেদ। হৈম, রাত্রে তো ব্যাঙের ডাক
শুনে জেগে থাকিস, আর কোনো জাতের ডাক শুনিস কি
দিনের বেলায়।

হৈম

কী জানি ভাই, মিস্ত্র দৈবাৎ ওঁর মন্ত্রপড়া জলের ঘটি
উলটিয়ে দিতেই উনি যে হাঁক দিয়ে উঠেছিলেন সেটা—

পুষ্প

হাঁ, সেটা চারপেয়ে ডাক। মিলছে এই শাস্ত্রের সঙ্গে।

ফকির

সোহং ব্রহ্ম, সোহং ব্রহ্ম, সোহং ব্রহ্ম ।

পুষ্প

ফকিরদা, তপস্যা যখন ভেঙেছিল শিব এসেছিলেন
তঁার বরদাত্রীর কাছে—তোমার তপস্যা এবার গুটিয়ে
নাও ; এই দেখো, বরদাত্রী অপেক্ষা করে আছেন
লালপেড়ে শাড়িখানি পরে ।

হৈম

পুষ্পদিদি, বরদাত্রীর জন্তে ভাবনা নেই ; পাড় দেখা
দিচ্ছে রঙ বেরঙের ।

পুষ্প

বুঝেছি, গেরুয়া রঙের ছটা বুঝি ঘরের দেয়াল পেরিয়ে
বাইরে ছড়িয়ে পড়েছে ?

হৈম

এরই মধ্যে আসতে আরম্ভ করেছেন দুটি একটি করে
বরদাত্রী । গেরুয়া রঙের নেশা মেয়েরা সামলাতে পারে
না । পোড়াকপালীদের মরণদশা আর কি ! সেদিন
এসেছিল একজন বেহায়া মেয়ে ওঁর কাছে মুক্তিমন্ত্র নেবে
ব'লে । হবি তো হ, আমারই ঘরে এসে পড়েছিল—
ছুটো-একটা খাঁটি কথা শুনিয়েছিলুম, মুক্তিমন্ত্রেরই কাজ
করেছিল, গেল মাথা ঝাঁকানি দিয়ে বেরিয়ে ।

ফকির

দেখো আমার মাণ্ডুক্যটা দাও ।

পুষ্প

কী করবে ।

ফকির

নারীর হাত লেগেছে, গঙ্গাজল দিয়ে ধুয়ে আনিগে ।

পুষ্প

সেই ভালো, বুদ্ধি দিয়ে ধোওয়াটা তো হল না
এ জন্মে ।

ফকির

শুনে যাও, হৈম । আজকে গুরুগৃহে নবরত্নদান ব্রত ।
আমি তাঁকে দেব সোনা, একটা গিনি চাই ।

হৈম

দিতে পারব না, স্বপ্নরমশায় পা ছুঁইয়ে বারণ করেছেন ।

পুষ্প

তোমার গুরুজির বুদ্ধি কাঞ্চনে অরুচি নেই !

ফকির

তাঁর মহিমা কী বুঝবে তোমরা ! কাঞ্চন পড়তে থাকে
তাঁর বুলির মধ্যে আর তিনি চোখ বুজে বলেন— ছং ফট্ ।
বাস, একেবারে ছাই হয়ে যায় । যারা তাঁর ভক্ত তাদের
এ স্বচক্ষে দেখা ।

পুষ্প

ঝুলিতে যদি ছাই ভরবারই দরকার থাকে, কাঠের
ছাই আছে, কয়লার ছাই আছে, সোনার ছাই দিয়ে
বোকামি কর কেন।

ফকির

হায় রে, এইটেই বুঝলে না! গুরুজি বলেছেন,
মহাদেবের তৃতীয় নেত্রে দণ্ড হয়েছিলেন কন্দর্প, সোনার
আসক্তি ছাই করতেই গুরুজির আবির্ভাব ধরাধামে। স্কুল
সোনার কামনা ভস্ম করে কানে দেবেন সূক্ষ্ম শোনা,
গুরুমন্ত্র।

পুষ্প

আর সহ্য হচ্ছে না, চল ভাই হৈমি, তোর পড়া বাকি
আছে।

ফকির

সোহং ব্রহ্ম, সোহং ব্রহ্ম, সোহং ব্রহ্ম।

পুষ্প

খানিক দূরে গিয়ে ফিরে এসে

রোসো ভাই, একটা কথা আছে, বলে যাই। ফকিরদা,
গুনেছি তোমার গুরু আমার সঙ্গে একবার দেখা করবার
ইচ্ছা প্রকাশ করেছিলেন।

ফকির

হাঁ, তিনি শুনেছেন, তুমি বেদান্ত পাস করেছ। তিনি আমাকে বলে রেখেছেন, নিশ্চয় তোমাকে তাঁর পায়ে এসে পড়তে হবে, বেদান্ত যাবে কোথায় ভেসে! সময় প্রায় হয়ে এল।

পুষ্প

বুঝতে পারছি ক'দিন ধরে কেবলই বাঁ চোখ নাচছে।

ফকির।

নাচছে? বটে! ঐ দেখো, অব্যর্থ তাঁর বাক্য। টান ধরেছে।

পুষ্প

কিন্তু আগে থাকতে বলে রাখছি, ছাই করে দেবার মতো মালমসলা আমার মধ্যে বেশি পাবেন না। যা ছিল সব পাস করতে করতে গুনিভাসিটির ঝাঁপ্তাকুড়ে ভর্তি করে দিয়েছি।

হৈম

কী বলছ ভাই, পুষ্পদিদি! কোন্ ভূতে আবার তোমাকে পেল।

পুষ্প

কী জানি ভাই, দেশের হাওয়ায় এটা ঘটায়। বুদ্ধিতে কাঁপন দিয়ে হঠাৎ আসে যেন ম্যালেরিয়ার গুরুগুরুনি।

মনে হচ্ছে, রবি ঠাকুরের একটা গান শুনেছিলুম—

গেরুয়া ফাঁদ পাতা ভুবনে,
কে কোথা ধরা পড়ে কে জানে !

ফকির

পুষ্পদি, তুমি যে এতদূর এগিয়েছ তা আমি জানতুম
না। পূর্বজন্মের কর্মফল আর কি !

পুষ্প

নিশ্চয়ই, অনেক জন্মের অবুদ্ধিকে দম দিতে দিতে
এমন অদ্ভুত বুদ্ধি হঠাৎ পাক খেয়ে ওঠে— তার পরে আর
রক্ষে নেই।

ফকির

উঃ, আশ্চর্য ! ধন্য তুমি ! সংসারে কেউ কেউ থাকে
যারা একেবারেই— কী বলব !

পুষ্প

একেবারে শেষের দিক থেকেই শুরু করে। রবি ঠাকুর
বলেছেন—

যখনি জাগিলে বিশ্বে পূর্ণপ্রস্ফুটিত।

ফকির

বা বা, বেশ বলেছেন রবি ঠাকুর—আমি তো কখনো
পড়ি নি !

পুষ্প

ভালো করেছ, পড়লে বিপদেই পড়তে। ভাই হৈমি,
তোর সেই মটরদানার ছুনলী হারটা আমাকে দে দেখি।
মহাপুরুষদের দর্শনে খালি হাতে যেতে নেই।

হৈম

কী বল, দিদি! ও যে আমার শাশুড়ির দেওয়া!

পুষ্প

এ মানুষটিও তো তোর শাশুড়ির দেওয়া, এও যেখানে
তলিয়েছে ওটাও সেখানে যাবে নাই।

ফকির

অবোধ নারী, আসক্তি ত্যাগ করো, গুরুচরণে নিবেদন
করো যা কিছু আছে তোমার।

পুষ্প

হৈমি, বিশ্বাস করে দাও আমাব হাতে, লোকসান
হবে না।

ফকির

আতা, বিশ্বাস— বিশ্বাসই সব! আমার ছোটো
ছেলেটার নাম দেব—অমূল্যধন বিশ্বাস।

(পুষ্প

হৈমি, ভয় নেই, আমার সাধনা হারাধন ফেরানো।
গুরুকৃপায় সিদ্ধিলাভ হবে।)

দ্বিতীয় দৃশ্য

গুরুধাম

শিষ্যশিষ্যাপরিবৃত গুরু। জটাজ্জাল বিলম্বিত পিঠের উপরে।
গেক্কা চাদরখানা স্থল উদরের উপর দিয়ে বঁকে পড়েছে, ঘোলা জলের
ঝরনার মতো। ধূপধূনা। গম্বির এক পাশে খড়ম, যারা আসছে
খড়মকে প্রণাম করছে, দীর্ঘনিশ্বাস ফেলে বলছে— গুরো। গুরুর চক্ষু
মুদ্রিত, বুকের কাছে দুই হাত জোড়া। মেয়েরা থেকে থেকে আঁচল
দিয়ে চোখ মুচছে। ছজন দু পাশে দাঁড়িয়ে পাখা করছে। অনেকক্ষণ
সব নিস্তব্ধ।

গুরু

তথাং চোখ খুলে

এই-যে, তোমরা সবাই এসেছ, জানতেই পারি নি।
সিদ্ধিরস্ত সিদ্ধিরস্ত। এখন মন দিয়ে শোনো আমার কথা।

সেবক

মন তো প'ড়েই আছে গুরুর চরণে।

শিষ্যাদের ফুঁপিয়ে ফুঁপিয়ে কান্না

গুরু

আজ তোমাদের বড়ো কঠিন পরীক্ষা। মুক্তির সাতটা
দরজার মধ্যে এইটে হল তিনের দরজা। শিবোহং
শিবোহং শিবোহং। এইটে কোনোমতে পেরলে হয়।
যাদের ধনের থলি ফেঁপে উঠেছে উছুরি-কুগির পেটের মতো,

তারা এই সৰু দরজায় যায় আটকে, জাঁতাকলের মতো ।

সকলে

হায় হায় হায়, হায় হায় হায় !

গুরু

এইখানে এসে মুক্তির ইচ্ছেতেই ঘটে বাধা । কেউ
বসে পড়ে, কেউ ফিরে যায় । তার পরে এক ছই তিন,
ঘণ্টা পড়ল, বাস্— হয়ে গেল, ডুবল নৌকো, আর টিকি
দেখবার জো থাকে না । ক্রিং ক্রিং ক্রম্ ।

সকলে

হায় হায় হায়, হায় হায় হায় !

গুরু

এতকাল আমার সংসর্গে থেকে তোমাদের ধনের লোভ
কিছু হান্ধা হয়েছে যদি দেখি, তা হলে আর মার নেই ।
এইবার তবে শুরু হোক । ওহে চরণদাস, গানটা ধরো ।

গুরুপদে মন করো অর্পণ,

ঢালো ধন তাঁর ঝুলিতে—

লঘু হবে ভার, রবে নাকো আর

ভবের দোলায় ঝুলিতে ।

হিসাবের খাতা নাড় ব'সে ব'সে,

মহাজনে নেয় সুদ কষে কষে—

খাঁটি যেই জন সেই মহাজনে

কেন থাক হায় ভুলিতে,
দিন চলে যায় ট্যাকে টাকা হায়
কেবলি খুলিতে তুলিতে ।

গুরু

কী নিতাই, চুপ করে বসে বসে মাথা চুলকোচ্ছ যে ?
মন খারাপ হয়ে গেছে বুঝি । আচ্ছা, এই নে, পায়ের
ধুলো নে ।

নিতাই

তা, গুরুর কাছে মিথ্যে কথা বলব না । খুবই ভাবনা
আছে মনে । কাল সারারাত ধস্তাধস্তি করে জ্বরী বাঙ্গ
ভেঙে বাজুবন্দজোড়া এনেছি ।

গুরু

এনেছ, তবে আর ভাবনা কী ।

নিতাই

প্রভো, ভাবনা তো এখন থেকেই । বউ বলেছে, ঘরে
যদি ফিরি তবে কাঁটাপেটা করে দূর করে দেবে ।

গুরু

সেজ্ঞে এত ভয় কেন ।

নিতাই

এ মারটা প্রভুর জানা নেই, তাই বলছেন ।

গুরু

নারদসংহিতায় বলে, দাম্পত্যকলহে চৈব— ঝগড়া
জুদিনে যাবে মিটে।

নিতাই

ঐ নারীটিকে চেনেন না। সীতা-সাবিত্রীর সঙ্গে মেলে
না। নাম দিয়েছি হিড়িম্বা। তা, বরঞ্চ যদি অমুমতি
পাই তা হলে দ্বিতীয় সংসার করে শান্তিপুরে বাসা বাঁধব।

গুরু

দোষ কী! বশিষ্ঠ প্রভৃতি ঋষিরা বলেছেন, অধিকন্তু
ন দোষায়। সেইরকম দৃষ্টান্তও দেখিয়েছেন। পুরুষের
পক্ষে স্ত্রী গৌরবে বহুবচন।

মাধব

তার মানে একাই এক সহস্র।

গুরু

উল্টো। আধ্যাত্মিক অর্থে পুরুষের পক্ষে এক সহস্রই
একা। বড়ো বড়ো সজ্জন কুলীন বহু কষ্টে তার প্রমাণ
দিয়েছেন। সেই জেতাই এ দেশকে বলে পুণ্যভূমি—
পুণ্য বিবাহকর্মে আমাদের পুরুষদের ক্লান্তি নেই।

মাধব নিঃশব্দ

আহা, এ দেশের আধ্যাত্মিক বিবাহের এমন সুন্দর
ব্যাখ্যা আর কখনো শুনি নি।

গুরু

কী গো -বিপিন, প্রস্তুত তো ? যেমন বলেছিলুম, কাল
তো সারারাত জপ করেছিলে— সোনা মিথ্যে, সোনা
মিথ্যে ; সব ছাই, সব ছাই ?

মাধব

জপেছি । মোহরটা আবে যেন তাবার মতো জ্বল জ্বল
করতে লাগল মনেব মধো ।

গুরু পা জড়িয়ে ধ'বে

প্রভু, আমি পাপিষ্ঠ, এবারকার মতো মাপ করো,
আরো কিছুদিন সময় দাও ।

গুরু

এই রে । মোলো, মোলো দেখছি । সর্বনাশ হল ।
দিতে এসে ফিরিয়ে নেওয়া, এ যে গুরুর ধন চুরি করা !

ঝুলি এগিয়ে দিয়ে

ফেল্, ফেল্ বলছি, এখুনি ফেল্ ।

মাধব বহু কষ্টে কল্পিত হস্তে কমাল থেকে মোহর

খুলে নিয়ে ঝুলিতে ফেলল

এইবার সবাই মিলে বলো দেখি—

সোনা ছাই, সোনা ছাই, সোনা ছাই ।

নাহি চাই, নাহি চাই, নাহি চাই ।

নয়ন মুদিলে পরে কিছু নাই, কিছু নাই, কিছু নাই ।

সকলের চাঁৎকাবন্ধরে আবৃত্তি

এই-যে মা তারিণী ! এস এস, এই নাও আশীর্বাদ ।
তোমার ভাবনা নেই, তুমি অনেক দূরে এগিয়েছ । তোমরা
মেয়েমানুষ, তোমাদের সরল ভক্তি, দেখে পুরুষদের শিক্ষা
হোক ।

তারিণী পায়ের কাছে এক জোড়া বালা রেখে অনেকক্ষণ

মাথা ঠেকিয়ে রাখল । গুরু হাতে ঘুরিয়ে ঘুরিয়ে

গুরুভার বটে— বন্ধনটা বেশ একটু চাপ দিয়েছিল
মনটাকে । যাকগে, এতদিনে হাতের বেড়ি তোমার খসল ।
লোহার বেড়ির চেয়ে অনেক কঠিন— ঠিক কিনা, মা ?

তারিণী

খুব ঠিক, বাবা । মনে হচ্ছে, খানিকটা মাংস কেটে
নিলে ।

গুরু

মাংস নয়, মাংস নয়, মোহপাশ । গ্রন্থি এই সবে
আলুগা হতে গুরু করল, তার পরে ক্রমে ক্রমে—

তারিণী

না বাবা, আর পারব না । মেয়ের বিয়ের জন্তে
শাশুড়ির আমলের গয়নাগুলি যত্ন করে রেখে দিয়েছি ।

গুরু

খালি মধ্যে বালাজোড়া ফেলে দিয়ে

আচ্ছা আচ্ছা, এখনকার মতো এই পর্যন্তই থাক ।

কোমরা বলো সবাই— সোনা ছাই—

সকলের আশুভ

আরে বলদেও, ক্যা খবর ?

বলদেও

পায়ের কাছে হাজার টাকার নোট রেখে

খবর আঁখসে দেখ্ লিজিয়ে হজরৎ ।

গুরু

ভালা ভালা, দিল তো খুশ হায় ?

বলদেও

পহেলা তো বহুৎ ঘবড়া গিয়া থা । রাত ভর মেরে
জীবাশ্বানেসে হাজারো দফে বাতায় লিয়া কি, কুছ্ নেই,
কুছ্ নেই, ইয়ে তো শ্রেফ কাগজ হ্যায়, হাওয়াসে চলা
জাতা, আগ্‌সে জ্বল্ জাতা, পানীমেসে গল্ জাতা, ইস্‌কো
কিন্মৎ কোড়িসে ভি কমতি হ্যায় । লিকেন আশ্বারাম
সারা বখৎ গড়বড় করতে থে । মেরে ঐসী বুদ্ধি লগি
ইয়ে কাগজ তো গুরুজিকে পাঁও পর ডারনেকে লায়েক
একদম নেই হ্যায়— ইস্‌সে দো এক কপৈয়া ভি অচ্ছি
হ্যায় । পিছে ফজিরমে দো লোটা ভর ভাঙ যব পী লিয়া,
তব সব চুরন্ত হো গয়া । মেরে দিল হান্কা হো গয়া ইয়ে
কাগজকা মাফিক ।

গুরু

জীতা রহো বাবা, পরমাত্মা তুম্বাকো ভালো করে ।
বলো সবাই—

নোটগুলো সব ঝুটো, সব ঝুটো, সব ঝুটো—

ওরা সব খড়কুটো, খড়কুটো, খড়কুটো—

ছাই হয়ে উড়ে বাবে মুঠো মুঠো, মুঠো মুঠো, মুঠো মুঠো ।

সকলের আবৃত্তি

গুরু

আজ ফকিরকে দেখছি নে যে বড়ো ।

বলদেও

এক ঔরং ফকিরচাঁদজিকো আপনি সাথ লেকে আয়ি
হ্যায় । নয়্যা আদমি, হমারা মালুম দিয়া কি ভিতর আকে
চিল্লায়েগি— ইস্বাস্তে দোনোকো বাহার খাড়া রখখা
হ্যায় । হুকুম মিল্নেসে লে আয়গা ।

গুরু

কী সর্বনাশ ! ঔরং ! আরে নিয়ে আয়, নিয়ে আয়,
এখখনি নিয়ে আয় । এইখানে একটা ভালো আসন
পেতে দে, মেয়েটা হাতছাড়া না হয় !

ফকিরের সঙ্গে পুষ্পর প্রবেশ

গুরু

এস এস, মা এস। মুখ দেখেই বুঝছি, দৈববাণীর বাহন হয়ে এসেছ।

পুষ্প

ভুল বুঝছেন। আমি ছাই ফেলবার ভাঙা কুলো হয়েই এসেছি। এই আমার সঙ্গে যঁাকে দেখছেন, এত বড়ো বিস্কৃত ছাইয়ের গাদা কোম্পানির মুল্লকে আর পাবেন না। কোনোদিন ওঁর মধ্যে পৈত্রিক সোনার আভাস হয়তো কিছু ছিল— গুরুর আশীর্বাদে চিহ্নমাত্রই নেই।

গুরু

এসব কথার অর্থ কী!

পুষ্প

অর্থ এই যে, এঁর বাপ এঁকে ত্যাগ করেছেন, ইনি ত্যাগ করতে যাচ্ছেন এঁর স্ত্রীকে। এক পয়সার সম্বল এঁর নেই। শুনেছি, আপনার এখানে সকলরকম আবর্জনারই স্থান আছে, তাই রইলেন ইনি আপনার শ্রীপাদপদ্মে।

ফকির

অ্যা, এসব কথা কী বলছ, পুষ্পদি। ঐ তো সোনার হারগাছা নিয়ে আসা গেল— গুরুচরণে রাখবে না?

পুষ্প

রাখব বৈকি ।

গুণকব হাতে দিয়ে

তৃপ্ত হলেন তো ?

গুরু

হারখানা হাতে নিয়ে ওজন আন্দাজ ক'রে

আমার অতি যৎসামান্যেই তৃপ্তি । পত্রং পুষ্পং ফলং
তায়ং ।

ফকির

ভুল করবেন না প্রভু, ওটা আমারই দান ।

পুষ্প

ভুল ভাঙানো জরুরি দরকার, নইলে আসন্ন বিপদ ।
ঐ বাবা বিশ্বেশ্বরবাবু পুলিশে খবর দিয়েছেন, তাঁর হার
রি গেছে । খানাতল্লাসি কবতে এখনি আসছে মখলু-
গঞ্জের বড়ো দারোগা দবিরুদ্দিন সাহেব ।

গুরু

দাঁড়িয়ে উঠে

কী সর্বনাশ !

পুষ্প

কোনো ভয় নেই, এখনি সোনাগুলোকে ভস্ম করে
ফলুন, পুলিশের উপর সেটা প্রকাণ্ড একটা কানমলা হবে ।

গুরু

কাতরস্বরে

বলদেও !

বলদেও

লাঠি বাগিয়ে

কুছ পরোয়া নেই, ভগবান । আপ তো পরমাশ্রা হো,
আপকো ছকুমসে হম লড়াই করেঙ্গে ।

মথুর

গুরুজি, ওর ভরসায় থাকবেন না । ওর ভাঙের নেশা
এখনও ভাঙে নি । লালপাগড়ি দেখলেই যাবে ছুটে ।
আপাতত আপনি দৌড় দিন । কী জানি, এই নোটখানা
পরমাশ্রার ভরসায় ওর কোন্ মনিবের বাস্তু ভেঙে নিয়ে
এসেছে !

গুরু

অ্যা, বল কী মথুর । পালাব কোথায় । ওরা যে
আমার বাসার ঠিকানা জানে । এখন এই ঝুলিটা তোমরা
কে রাখবে ।

সকলে

কেউ না, কেউ না ।

তারিণী

আমার বালা জোড়া ফিরিয়ে দাও ।

গুরু

~~এক জনি, এক জনি~~ আর বলদেও, তোমার নোটখানা
তুমি নাও, বাবা ।

বলদেও

অব ভি তো নেই সকেঙ্গে । পুলিশ চলা জানেসে পিছে
লেউঙ্গা ।

পুষ্প

আচ্ছা, আমারই হাতে বুলিটা দিন । পুলিশের কর্তার
সঙ্গে পরিচয় আছে । যার যার জিনিস সবাইকে ফিরিয়ে
দেব ।

মথুর

ওরে বাস্ রে, স্পাই রে স্পাই । (কারও রক্ষা নেই
আজ ।)

গুরু

স্পাই ! সর্বনাশ !

উদ্বাস্থাসে

চললুম আমি । মোটরটা আছে ?

একজন

আছে ।

ফকির

পায়ে ধরে

প্রভো, আমি কিন্তু ছাড়ছি নে তোমার সঙ্গ ।

গুরু

দূর দূর দূর । ছাড়্, ছাড়্ বলছি । লক্ষ্মীছাড়া !
হতভাগা !

ফকির

তা, আমার কী দশা হবে ! আমার কোথায় গতি !

গুরু

তোমার গতি গো-ভাগাড়ে ।

দ্রুত প্রস্থান

বিপিন

মা গো, ঐ বুলির মধ্যে আমার আছে মোহরটা ।

নিতাই

আর, আমার আছে বাজুবন্দ ।

পুষ্প

এই নাও তোমরা ।

সকলে .

তুমিই রক্ষা করলে মা, শুঁড়ে প্রাণ এল

বলদেও

মাইজি, উয়ো নোট হমকো দে দীজিয়ে । আফিস্কে
বখৎমে থোড়ি দেব হ্যায় ।

পুষ্প

এই নাও, ঠিক জায়গায় পৌঁছিয়ে দেবে তো ?

বলদেও

জরুর । পরমাত্মাজি তো ফেবার হো গয়া, দুস্‌রা
লেনেওয়ালা কোই হ্যায় নেই সওয়ায় মনিব ঔর ডাকু ।
মালুম থা কি নোট ভস্ম হো জায়গা, উস্‌কা পত্তা নহি
মিলেগা, মেরা পুণ্য ঔব পুলিসকী ডাণ্ডা ফরক্‌ রহেগা ।
অভি দেখ্তা হুঁ কি হিসাবকি থোড়ি গলতি থী । হব
হর, বোম্‌ বোম্‌ ।

প্রস্থান

পুষ্প

ফকিরদা, মাথায় হাত দিয়ে ভাবছ কী । গুরু
পদধূলি তো আঠাবো আনা মিলেছে । এখন ঘবে চলো ।

ফকির

যাব না ।

পুষ্প

কোথায় যাবে ।

ফকির

রাস্তায় ।

পুষ্প

আচ্ছা বেশ, ছান্দোগ্যটা তো নিয়ে আসতে হবে !

ফকির

সে আমার সঙ্গে আছে ।

পুষ্প

কিন্তু, তোমার গুরু ?

ফকির

রইলেন আমার অন্তরে ।

পুষ্প

আর, ডিমের খোলাটা ?

ফকির

সে বুলছে গামছায় বাঁধা বুকের কাছে ।

প্রহ্মান

পুষ্প

পিছন থেকে

সোহয়মাছা চতুষ্পাৎ ।

হৈমর প্রবেশ

পুষ্প

বিশ্বাস করতে পারিস নে বুঝি ? এই নে তোর হার ।

হৈম

আর, অন্যটি ?

পুষ্প

এখনকার মতো চাব পা তুলে সে বেড়া ডিঙিয়েছে।

হৈম

তাব পব ?

পুষ্প

লম্বা দড়ি আছে।

হৈম

আমাব কিন্তু ভয় হচ্ছে।

পুষ্প

তুই হাঁউমাউ কবিস নে তো। চতুষ্পদ একটু চরে
বেড়াক-না !

হৈম

উনি ছান্দোগ্য নিয়ে যখন বেরলেন তখনি বুঝলুম,
ফিরবেন না ! মণ্ডুক মানে ব্যাঙ বুঝি ভাই ?

পুষ্প

হাঁ।

হৈম

উনি আজকাল বলতে আরম্ভ করেছেন, মানুষের আত্মা
হচ্ছে ব্যাঙ। সেই পরম ব্যাঙ যখন অন্তবে কুড়ুর কুড়ুর

করে ডাকে তখনি বোঝা যায় সে পরমানন্দে আছে ।

পুষ্প

তাই হোক-না, ওর আত্মা দেশে বিদেশে ডেকে বেড়াক,
তোর আত্মা-ব্যাঙ এখন কিছুদিনের মতো ঘুমিয়ে নিক ।

হৈম

মনটা যে ছ ছ করবে, তার চেয়ে ব্যাঙের ডাক যে
জ্বালো ।

পুষ্প

ভয় নেই, আনব তোর মাণ্ডুক্যকে ফিরিয়ে ।

তৃতীয় দৃশ্য

ষষ্ঠীচরণ । পুষ্প

ষষ্ঠী

মা, শরণ নিলুম তোমার ।

পুষ্প

খবর নিয়েছি পাড়ায়, তোমার নাতি মাখন পলাতক
সাত বছর থেকে— সংসারের ছুনলা বন্দুক লেগেছে তার
বুকে, ছুঁখ এখনো ভুলতে পারে নি । একটা বিয়ে করলে
পুরুষের পা পড়ে না মাটিতে, তোলা থাকে স্ত্রীর মাথার
উপরে ; আর, ছোটো বিয়ে কবলেই ছুজোড়া মল বাজতে
থাকে ওদের পিঠে, শিরদাঁড়া যায় বেঁকে ।

ষষ্ঠী

কী না জান তুমি, মা । নবগ্রাম থেকে আরম্ভ করে
মথলুগঞ্জ পর্যন্ত সব কটা গাঁ যে তুমি জিতে নিয়েছ ।
বিধাতাপুরুষ নির্ভুর, তাই তোমায় মোলাম কবতে হয় তাঁর
শাসন ।

পুষ্প

না জ্যাঠামশায়, বাড়িয়ে বোলো না । আমি মজা

দেখতে বেরিয়েছি— ছুটি পেয়েছি বই পড়ার গারদ থেকে ।
দেখতে এলুম কেমন ক'রে নিজের পায়ে বেড়ি আর নিজের
গলায় ফাঁস পরাতে নিস্পিস্ করতে থাকে মানুষের
হাত দুটো । এ না হলে ভবের খেলা জমত না । ভগবান
বোধ হয় রসিক লোক, হাসতে ভালোবাসেন ।

ষষ্ঠী

না মা, সবই অদৃষ্ট । হাতে হাতে দেখো-না ! বড়ো
বোয়ের ছেলেপুলের দেখা নেই । ভাবলেম, পিতৃপুরুষ
পিণ্ডি না পেয়ে শুকিয়ে মরবেন বৈতরণীতীবে । ধ'রে-
বেঁধে দিলেম মাখনের দ্বিতীয় বিয়ে, আর সবুর সইল না,
দেখতে দেখতে পরে পরে ছুই পক্ষেরই কল্যাণে চারটি মেয়ে
তিনটি ছেলে দেখা দিল আমার ঘরে ।

পুষ্প

এবারে পিতৃপুরুষের অজীর্ণ রোগের আশঙ্কা দেখছি ।

ষষ্ঠী

মা, তোমার সব ভালো, কেবল একটা বড়ো খটকা
লাগে— মনে হয়, তুমি দেবতা-ব্রাহ্মণ মানই না ।

পুষ্প

কথাটা সত্যি ।

ষষ্ঠী

কেন মা, ঐ খুঁটুকু কেন থেকে যায় ।

পুষ্প

সংসারে দেবতা-ব্রাহ্মণের অবিচারের বিরুদ্ধেই যে
লড়াই করতে হয়, ওদের মানলে জোর পেতুম না। সে
কথা পরে হবে, আমি মাখনের খোঁজেই আছি।

ষষ্ঠী

জান তো মা, ও কিরকম হো হো করে বেড়াত—
কেবল খেলাধুলো, কেবল ঠাট্টাতামাসা। ভয় হত, কোথায়
কী করে বসে! তাই তো ওর গলায় একটা নোঙরের
পর আর-একটা নোঙর ঝুলিয়ে দিলুম।

পুষ্প

নোঙর বেড়েই চলল, ভারে নৌকো তলিয়ে যাবার
জো। আমি তোমাদের পাড়ায় এসেছি হৈমির খবর
নেবার জন্তে। শুনলুম, সে তোমার এখানেই আছে।

ষষ্ঠী

হাঁ মা, এতদিন আমি ছিলুম নামেই মামা। তার
বিয়ের পর থেকে এই তাকে দেখলুম। বুক জুড়িয়ে গেল
তার মধুর স্বভাবে। তারও স্বামী পালিয়েছে। হল কী বলো
তো! কনুগ্রেসওয়ালারা এর কিছু করে উঠতে পারলে না?

পুষ্প

মহাত্মাজিকে বললে এখনি তিনি মেয়েদের লাগিয়ে

দেবেন অসহযোগ আন্দোলনে। দেশে হাতাবেড়ির
আওয়াজ একেবারে হবে বন্ধ। গলির মোড়ে খুঁ ময়রার
দোকানে তেলে-ভাজা ফুলুরি খেয়ে বাবুদের আপিসে
ছুটতে হবে— দুদিন বাদেই সিক্ লীভের দরখাস্ত।

যষ্ঠী

ও সর্বনাশ!

পুষ্প

ভয় নেই, মেয়েদের হয়ে আমি মহাআজিকে দরবার
জানাব না। বরঞ্চ রবি ঠাকুরকে ধরব, যদি তিনি একটা
গ্রহসন লিখে দেন।

যষ্ঠী

কিন্তু, রবি ঠাকুর কি আজকাল লিখতে পারে। আমার
শ্যালার কাছে—

পুষ্প

আর বলতে হবে না। কথাটা রাষ্ট্র হয়ে গেছে
দেখছি। কিন্তু ভাবনা নেই, লেখন্দাজ ঢের জুটে গেছে।
দ্বাদশ আদিত্য বললেই হয়।

যষ্ঠী

বরঞ্চ লিখতেই যদি হয়, আমি তো মনে করি, আজ-
কাল মেয়েরা যেরকম—

পুষ্প

অসহ, অসহ । জামা-শেমিজ পরার পর থেকে ওদের
নজ্জাশরম সব গেছে ।

যষ্ঠী

সেদিন কলকাতায় গিয়েছিলুম ; দেখি, মেয়েরা ট্র্যামে
বাসে এমনি ভিড় কবেছে—

পুষ্প

যে পুরুষ বেচাবারা খালি গাড়ি পেলেও নড়তে চায়
না । ও কথা যাক্গে— মাখনের জন্তে ভেবো না ।

যষ্ঠী

সেই ভালো, তোমার উপরেই ভার রইল ।

যষ্ঠীর প্রস্থান । হৈমব প্রবেশ

হৈম

শুনলুম তুমি এসেছ, তাই তাড়াতাড়ি এলুম ।

পুষ্প

ধূতবাঈ অন্ধ ছিলেন, তাই গান্ধারী চোখে কাপড় বেঁধে
অন্ধ সাজলেন । তোমারও সেই দশা । স্বামী এল বেরিয়ে
রাস্তায়, স্ত্রী এল বেরিয়ে মামার বাড়িতে ।

হৈম

মন টেঁকে না ভাই, কী করি ! তুমি বলেছিলে,
হারাধন ফিরিয়ে আনবে ।

পুষ্প

একটু সবুর করো— ছিপ ফেলতে হয় সাবধানে ;
একটা ধরতে যাই, দুটো এসে পড়ে টোপ গিলতে ।

হৈম

আমার তো দুটোতে দরকার নেই ।

পুষ্প

যেরকম দিনকাল পড়েছে, দুটো-একটা বাড়তি হাতে
রাখা ভালো । কে জানে কোন্টো কখন ফস্কে যায় ।

হৈম

আচ্ছা, একটা কথা জিজ্ঞাসা করি । দেখলুম কাগজে
তোমার নাম দিয়ে একটা বিজ্ঞাপন বেরিয়েছে—

পুষ্প

হ্যাঁ, সেটা আমারই কীর্তি ।

হৈম

তাতে লিখেছ, প্রাইভেট সিনেমায় সেতুবন্ধ নাটকের
জুড়ে লোক চাই, হনুমানের পার্ট অভিনয় করবে । তোমার
আবার সিনেমা কোথায় ।

পুষ্প

এই তো চার দিকেই চলচ্ছবির নাট্যশালা, তোমাদের
সবাইকে নিয়েই ।

হৈম

তা যেন বুকলুম, এর মধ্যে হুসুমানের অভাব ঘটল
কবে থেকে ।

পুষ্প

দল পুরু আছে ঘরে ঘরে । একটা পাগলা পালিয়েছে
লেজ তুলে, ডাক দিচ্ছি তাকে ।

হৈম

সাড়া মিলেছে ?

পুষ্প

মিলেছে ।

হৈম

তাব পরে ?

পুষ্প

বহুস্থ এখন ভেদ কবব না ।

হৈম

যা খুশি কোরো, আমার প্রাণীটিকে বেশি দিন ছাড়া
রেখে না । 'ঐ' কে আসছে ভাই, দাড়িগোঁফঝোলা চেহারা
— ওকে তাড়িয়ে দিতে বলে দিই ।

পুষ্প

না না, তুমি বরঞ্চ যাও, আমি ওর সঙ্গে কাজ সেরে
নিই ।

হৈমর প্রস্থান । সেই লোকের প্রবেশ

পুষ্প

তুমি কে ?

সেই লোক

সেটা প্রকাশের যোগ্য নয় গোড়া থেকেই, জন্মকাল থেকেই । আমি বিধাতার কুকীৰ্তি, হাতের কাজের যে নমুনা দেখিয়েছেন তাতে তাঁর স্মনাম হয় নি ।

পুষ্প

মন্দ তো লাগছে না !

সেই লোক

অর্থাৎ, মজা লাগছে । ঐ গুণেই বেঁচে গেছি । প্রথম ধাক্কাটা সামলে নিলেই লোকের মজা লাগে । লোক হাসিয়েছি বিস্তর ।

পুষ্প

কিন্তু, সব জায়গায় মজা লাগে নি ।

সেই লোক

খবর পেয়েছ দেখছি । তা হলে আর লুকিয়ে কী হবে । নাম আমার শ্রীমাখনচন্দ্র । বুঝতেই পারছ, যাত্রার দলের সরকারি গৌফদাড়ি পরে এসেছি কেন । এ পাড়ায় মুখ দেখাবার সাহস নেই, পিঠ দেখানোই অভ্যেস হয়ে গেছে ।

পুষ্প

এলে যে বড়ো ?

মাখন

চলেছিলুম নাজিরপুরে ইলিষ মাছ ধরার দলে।
ইস্টেশনে দেখি বিজ্ঞাপন, হনুমানের দরকার। রইল
পড়ে জেলেগিরি। জেলেরা ছাড়তে চায় না, আমাকে
ভালোবাসে। আমি বললুম, ভাই, এদের বিজ্ঞাপনের
পয়সা বেবাক লোকসান হবে আমি যদি না যাই-- আর
দ্বিতীয় মানুষ নেই যার এত বড়ো যোগ্যতা। এ তো
আর ত্রেতাযুগ নয় !

পুষ্প

খাওয়াপরার কিছু টানাটানি পড়েছে বুঝি ?

মাখন

নিতান্ত অসহ্য হয় নি। কেবল যখন ধনেশাক দিয়ে
ডিমওয়াল। কই মাছের ঝোলের গন্ধস্বৃতি অন্তরাঙ্গার মধ্যে
পাক খেয়ে ওঠে, তখন আমার শ্রীমতী বাঁয়া আর শ্রীমতী
তবলার তেরেকেটে মেরেকেটে ভিরকুটি মিরকুটির তালে
তালে দূর থেকে মন কেমন ধড়্ ফড়্ করতে থাকে।

পুষ্প

তাই বুঝি ধরা দিতে এসেছ ?

মাখন

না না, মনটা এখনো তত দূর পর্যন্ত শক্ত হয় নি। শেষে বিজ্ঞাপনদাতার খবর নিতে এসে যখন দেখলুম, ঠিকানাটা এই আড়িনারই সীমানার মধ্যে তখন প্রথমটা তাবলুম বিজ্ঞাপনের মান রক্ষা করব, দেব এক লক্ষ। কিন্তু, রইলুম কেবল মজার লোভে। পণ করলুম, শেষ পর্যন্ত দেখতে হবে। দিদি, আমার কেমন সন্দেহ হচ্ছে, কোনো সূত্রে বুঝি আমাকে চিনতে, নইলে অমন বিজ্ঞাপন তোমার মাথায় আসত না।

পুষ্প

তোমার আঁচিলওয়ালা নাকের খ্যাতি পাড়ার লোকের মুখে মুখে। তোমার বিজ্ঞাপন তোমার নাকের উপর। বিশ্বকর্মার হাতে এ নাক ছবার তৈরি হতে পারে না— ছাঁচ তিনি মনের ক্ষোভে ভেঙে ফেলেছেন।

মাখন

এই নাকের জোরে একবার বেঁচে গিয়েছি, দিদি। মটরগুণ্ণে চুরি হল, সন্দেহ করে আমাকে ধরলে চৌকিদার। দারোগা বুদ্ধিমান; সে বললে, এ লোকটা চুরি করবে কোন্ সাহসে— নাক লুকোবে কোথায়। বুঝেছ, দিদি? আমার এ নাকটাতে ভাঁড়ামির ব্যাবসা চলে, চোরের ব্যাবসা একেবারে চলে না।

পুষ্প

কিন্তু তোমার হাতে যে কলার ছড়াটা দেখছি ওটা তো আমাব চেনা, কোনো ফিকিরে তোমার জুড়ি-অন্নপূর্ণার ঘব থেকে সরিয়ে নিয়েছ।

মাখন

অনেক দিনের পেটের জ্বালায় ওদের ভাঁড়ারে চুরি পূর্বে থেকেই অভ্যেস আছে।

পুষ্প

এত বড়ো কাঁদি নিয়ে কববে কী। হনুমানের পালার তালিম দেবে ?

মাখন

সে তো ছেলেবেলা থেকেই দিচ্ছি। পথের মধ্যে দেখলুম এক ব্রহ্মচারী বসে আছেন পাকুড়তলায়। আমার বদ অভ্যাস, হাসাতে চেষ্টা কবলুম—ঠোঁটের এক কোণও নড়াতে পারলুম না, মন্তব আউড়েই চলল। ভয় হল, বুঝি ব্রহ্মদত্তি হবে। কিন্তু, মুখ দেখে বুঝলুম উপোস করতে হতভাগা তিথিবিচার করছে না। ওর পাজিতে তিনটে চাবটে একাদশী একসঙ্গে জমাট বেঁধে গেছে। জিজ্ঞাসা করলুম, বাবাজি, খাবে কিছু? কপালে চোখ তুলে বললে, গুরুর কৃপা যদি হয়। মাঝে মাঝে দেখি মাথার নিচে পুঁথি রেখে নাক ডাকিয়ে ঘুমচ্ছেন, ডাকের

শব্দে ও-গাছের পাখি একটাও বাকি নেই। নাকের
সামনে রেখে আসব কলার ছড়াটা।

পুষ্প

লোকটার পরিচয় নিতে হবে তো।

মাখন

নিশ্চয় নিশ্চয়। হাসতে হাসতে পেট ফেটে যাবে,
আমার চেয়ে মজা।

পুষ্প

ভালো হল। হনুমানের সঙ্গে অঙ্গদ চাই। ওকে
তোমারই হাতে তৈরি করে নিতে হবে। শেওড়াফুলির
হাট উজাড় করে কলার কাঁদি আনিয়ে নেব।

মাখন

শুধু কলার কাঁদির কর্ম নয়।

পুষ্প

তা নয় বটে। যে কারখানায় তুমি নিজে তৈরি
সেখানকার ছই-চাকাওয়ালা যন্ত্রের তলায় ওকে ফেলা চাই।

মাখন

দয়াময়ী, জীবের প্রতি এত হিংসা ভালো নয়।

পুষ্প

ভয় নেই, আমি আছি, হঠাৎ অপঘাত ঘটতে দেব
না। আপাতত কলার ছড়াটা ওকে দিয়ে এস।

মাখন

আমাদের দেশে মেয়েরা থাকতে সন্ন্যাসী না খেয়ে
মরে না। কিন্তু, ও লোকটা ভুল করেছে— বৈরাগির
ব্যাবসা ওর নয়, ওর চেহারায় জলুষ নেই। নিতান্ত
নিজের স্ত্রী ছাড়া ওর খবরদারি করবার মানুষ মিলবে না।

পুষ্প

তোমার অমন চেহারা নিয়ে তুমি ছ বছর চালালে কী
করে।

মাখন

ময়রার দোকানে মাছি তাড়িয়েছি, পেয়েছি বাসি লুটি
তেলে-ভাজা, যার খন্দের জোটে না। যাত্রার দলে ভিত্তি
সেজেছি, জল খেতে দিয়েছেন অধিকারী মুড়কি আর পচা
কলা। সুবিধে পেলোই মা মাসি পাতিয়ে মেয়েদের পাঁচালি
গুনিয়ে দিয়েছি যখন পুরুষরা কাজে চলে গেছে—

ওরে ভাই, জানকীরে দিয়ে এস বন—

ওরে রে লক্ষ্মণ, এ কী কুলক্ষণ, বিপদ ঘটেছে বিলক্ষণ।
মা-জননীদের দুই চক্ষু দিয়ে অশ্রুধারা ঝরেছে— দু-চার
দিনের সঞ্চয় নিয়ে এসেছি। আমাকে ভালোবাসে সবাই।
জ্যাঠাইমা আমার যদি ছুটো বিয়ে না দিত তা হলে চাই কি
আমার নিজের স্ত্রীও হয়তো আমাকে ভালোবাসতে পারত।
বাইরে থেকে বুঝতে পারবে না, কিন্তু আমারও কেমন

অল্পেতেই মন গলে যায়। এই দেখো-না, এখন তোমাকে
মা-অঞ্জনা বলতে ইচ্ছে করছে।

পুষ্প

সেই ভালো, আমার নাতির সংখ্যা বেড়ে চলেছে,
দিদির পদটা বড় বেশি ভারি হয়ে উঠল। আচ্ছা, জিগেস
করি, তোমার মনটা কী বলছে।

মাখন

তবে মা, কথাটা খুলে বলি। অনেক দিন পরে এ
পাড়ার কাছাকাছি আসতেই প্রথম দিনেই আমার বিপদ
বাধল ফোড়নের গন্ধে। সেদিন আমাদের রান্নাঘরে পাঁঠা
চড়েছিল— সত্যি বলি, বড়ো বোয়ের মুখ খারাপ, কিন্তু
রান্নায় ওর হাত ভালো। সেদিন বাতাস শুঁকে শুঁকে বাড়ির
আনাচে কানাচে ঘুরে বেড়িয়েছি সারাদিন। তার পর
থেকে অর্ধভোজনের টানে এ পাড়া ছাড়া আমার অসাধ্য
হল। বারবার মনে পড়ছে, কত দিনের কত গালমন্দ আর
কত কাঁটাচক্কড়ি। একদিন দিব্যি গেলেছিলুম, এ বাড়িতে
কোনোদিন আর ঢুকব না। প্রতিজ্ঞা ভেঙেছি কাল।

পুষ্প

কিসে ভাঙাল।

মাখন

তালের বড়ার গন্ধে। দিনটা ছটফট করে কাটালুম।

রাস্তিরে যখন সব নিশুতি, বাইবে থেকে ছিটকিনি খুলে
ঢুকলুম ঘরে। খুট করে শব্দ হতেই আমার ছোটোটি এক
হাতে পিদিম এক হাতে লাঠি নিয়ে ঢুকে পড়ল ঘরে। মুখে
মেখে এসেছিলুম কালি, আমি হাঁ করে দাঁত খিঁচিয়ে
হাঁউমাউখাঁউ করে উঠতেই পতন ও মূর্ছা। বড়ো বৌ
একবার উকি মেরেই দিল দৌড়। আমি রয়ে বসে পেট
ভরে আহার করে ধামামুদ্র বড়া নিয়ে এলুম বেরিয়ে।

পুষ্প

কিছু প্রসাদ রেখে এলে না পতিব্রতাদের জন্যে ?

মাখন

অনেকখানি পায়ের ধুলো রেখে এসেছি, আব
বড়াগুলো নিয়ে এসেছি দলবলকে খাইয়ে দিতে।

পুষ্প

আচ্ছা, তোমাকে একটা কথা জিজ্ঞাসা কবি, সত্যি
বলবে ?

মাখন

দেখো মা, বিপদে না পড়লে আমি কখনো মিথ্যে কথা
কই নে।

পুষ্প

লোকে বলে, তুমি কাশীতে গিয়ে আরও একটা বিয়ে
করেছ।

মাখন

তা করেছে ।

পুষ্প

পিঠ সুড়্‌সুড়্‌ করছিল ?

মাখন

না মা, দুটো বিয়ে কাকে বলে হাড়ে হাড়ে জেনেছি ।
ভারি ইচ্ছা হল, একটা বিয়ে কী রকম মরবার আগে জেনে
নেব ।

পুষ্প

জেনে নিয়েছ সেটা ?

মাখন

বেশি দিন নয় । ভাগ্যবতী কিনা, পুণ্যফলে মারা
গেল সকাল-সকাল, স্বামী বর্তমানেই । ঘোমটা সবে খুলেছে
মাত্র ; কিন্তু ভালো ক'রে মুখ ফোটবার তখনো সময় হয়
নি । বেঁচে থাকলে কপালে কী ছিল বলা যায় না ।

পুষ্প

কার কপালে ?

মাখন

শক্ত কথা । জন্ম চার্জ

চতুর্থ দৃশ্য

নিদ্রামগ্ন ফকির । মুখের কাছে একছড়া কলা । জেগে উঠে কলার
ছড়া তুলে নেড়েচেড়ে দেখল

ফকির

আহা, গুরুদেবের কৃপা ।

ছড়াটা মাথায় ঠেকিয়ে চোখ বুজে

শিবোহং শিবোহং শিবোহং ।

একটা একটা করে গোটা দশেক খেয়ে দীর্ঘনিশ্বাস ছেড়ে

আঃ !

মাথনের প্রবেশ

মাখন ।

কী দাদা, ভালো তো ! আমার নাম শ্রীমাখনানন্দ ।

ফকির

গুরুর চরণ ভরসা ।

মাখন

গুরুই খুঁজে মরছি । সদগুরু মেলে না তো । দয়া
হবে কি । নেবে কি অভাজনকে ।

ফকির

ভয় নেই, সময় হোক আগে ।

মাখন

কাম্মার সুরে

সময় আমার হবে না প্রভু, হবে না । দিন যে গেল !
বড়ো পাণী আমি । আমার কী গতি হবে ।

ফকির

গুরুপদে মন স্থির করো— শিবোহং ।

মাখন

এই পদেই ঠেকল আমার তরী ; যম তা হলে ভয়ে
কাছে ঘেঁষবে না ।

ফকির

তোমার নিষ্ঠা দেখে বড়ো সন্তুষ্ট হলুম !

মাখন

শুধু নিষ্ঠা নয় গুরু, এনেছি কিছু তালের বড়া । তাল-
গাছটা স্নদ্ধ উদ্ধার পাক্ ।

ফকির

ব্যগ্রভাবে আহা

আহা, সুস্বাদ বটে । ভক্তির দান কি না ।

মাখন

সার্থক হল আমার নিবেদন । বাড়ির ঐয়ারা খবর
পেলে কী খুশিই হবেন ! যাই, ওঁদের সংবাদ পাঠিয়ে
দিইগে, ওঁরা আরও কিছু হাতে নিয়ে আসবেন ।— প্রভু,

গৃহাশ্রমে আর কি ফিরবেন না ।

ফকির

আর কেন । গুরু বলেন, বৈরাগ্যং এবং ভয়ং ।

মাখন

গৃহী আমি, ডাইনে বাঁয়ে মায়া-মাকড়সানি জড়িয়েছে
অপাদমস্তক । ধনদৌলতের সোনার কেল্লাটা কত বড়ো
ফাঁকি সেটা খুব করেই বুঝে নিয়েছি । বুঝেছি সেটা নিছক
স্বপ্ন । ভগবান আমাকে অকিঞ্চন করে পথে পথে
ঘোবাবেন এই তো আমার দিনরাত্রির সাধনা, কিন্তু আর
তো পারি নে, একটা উপায় বাৎলিয়ে দাও ।

ফকির

আছে উপায় ।

মাখন

পা জড়িয়ে

বলে দাও, বলে দাও, বঞ্চিত কোরো না ।

ফকির

দিন-ভোর উপোস ক'রে থেকে—

মাখন

উপোস ! সর্বনাশ ! সেটা অভ্যেস নেই একেবারেই ।
আমার ছুটুগ্রহ দিনে চারবার করে আহার জুটিয়ে দিয়ে
অন্তরটা একেবারে নিরেট করে দিয়েছেন । আর কোনো

রাস্তা যদি—

ফকির

আচ্ছা, ছুখানা রুটি—

মাখন

আরও একটু দয়া করেন যদি, ছ'বাটি ফাঁর !

ফকির

ভালো, তাই হবে।

মাখন

আহা, কী করুণা প্রভুর ! তেমন করে পা যদি চেপে
থাকতে পারি তা হলে পাঁঠাটাও—

ফকির

না না, ওটা থাক্।

মাখন

আচ্ছা, তবে থাক্, একটা দিন বই তো নয়। তা,
কী করতে হবে বলুন। দেখুন, আমি মুখ্খু মাছুষ,
অনুস্বার-বিসর্গওয়ালা মন্তুর মুখ দিয়ে বেরবে না, কী বলতে
কী বলব, শেষকালে অপরাধ হবে।

ফকির

ভয় নেই, তোমার জন্তে সহজ করেই দিচ্ছি। গুরুর
মূর্তি স্মরণ করে সারারাত জপ করবে, সোনা তোমাকেই
দিলুম, তোমাকেই দিলুম, যতক্ষণ না ধ্যানের মধ্যে দেখবে,

সোনা আর নেই— কোথাও নেই ।

মাখন

হবে হবে প্রভু, এই অধমেরও হবে । বলব, সোনা
নেই, সোনা নেই ; এ হাতে নেই, ও হাতে নেই ; ট্যাঁকে
নেই, থলিতে নেই ; ব্যাঙ্কে নেই, বাজারে নেই । ঠিক
সুরে বাজবে মন্ত্র । আচ্ছা, গুরুজি, ওর সঙ্গে একটা
অমুস্বার জুড়ে দিলে হয় না ? নইলে নিতান্ত বাংলার
মতো শোনাচ্ছে । অমুস্বার দিলে জোর পাওয়া যায়—
সোনাং নেই, সোনাং নেই, কিছুং নেই, কিছুং নেই ।

ফকির

মন্দ শোনাচ্ছে না ।

মাখন

আচ্ছা, তবে অমুমতি হোক, পোলাওটা ঠাণ্ডা হয়ে
এল !

প্রস্থান

ফকিরের গান

শোন্ বে শোন্ অবোধ মন,—

শোন্ সাধুর উক্তি, কিসে মুক্তি

সেই স্মৃতি কর গ্রহণ ।

ভবের গুণ্ডি ভেঙে মুক্তি-মুক্তা কর অন্বেষণ

ওরে ও ভোলা মন ।

যষ্ঠাচরণ ছুটে এসে

যষ্ঠী

দেখি দেখি, এই তো দাছ আমার— আমার মাখন।

মুখে হাত বুলিয়ে

অমন চাঁদমুখখানা দাড়িগোঁফ দিয়ে একেবারে চাপা দিয়েছে। একে ভগবান আমার চোখে পরিয়েছে বুড়ো বয়সের ঠুলি, ভালো দেখতেই পাই নে, তার উপর এ কী কাণ্ড করেছিস, মাখন।

ফকির

সোহং ব্রহ্ম, সোহং ব্রহ্ম, সোহং ব্রহ্ম।

যষ্ঠী

করেছিস কী দাছ, মস্তুর প'ড়ে প'ড়ে অমন মিষ্টি গলায় কড়া পাড়িয়ে দিয়েছিস! সুর মোটা হয়ে গেছে!

ফকির

শিবোহং শিবোহং শিবোহং।

বামনদাস বাবুর প্রবেশ

বামনদাস

আরে আরে, আমাদের মাখন নাকি। খাঁটি তো ? ও যষ্ঠীদা, মানতেই হবে যোগবল— নাকের উপর থেকে ঝাঁচিলটা একেবারে সাফ দিয়েছে উড়িয়ে। ভট্‌চাক,

দেখে যাও-হে, নাকের উপর কী মস্তুর দেগেছিল গো !
একটু চিকু-রেখে যায় নি। ষষ্ঠীদা, ঐ নাক নিয়ে কত
ঝাড়ফুক করেছিলে, একটু টলাতে পার নি। তপিস্তুর
মাহাশ্মি বটে—

ষষ্ঠী

না ভাই, মাহাশ্মি ভালো লাগছে না। তোরা যাকে
বনতিস গণ্ডারী নাক, সে ছিল ভালো।

নিশিষ্ঠাকুর

ওর মুখমণ্ডল যে নিজেকে বেকবুল করছে, তার উপরে
আবার মুখে কথা নেই। অমন সব বোলচাল, মুনি হয়ে
সব ভুলেছে বুঝি !

ভজহারি

দেখি দেখি মাথনা, মুখটা দেখি।

চিমটি কেটে, চামড়া টেনে

না হে, ঐ মুখোষ নয়, ষষ্ঠীদা লাগিয়ে দিলে।

নিতাই

কিন্তু, দেখ তো টেনে ওর দাড়িগোঁফ সত্যি কি না !

ফকির

উঃ উঃ !

— চণ্ডী —

প্রাণে কিল মেরে

কেমন লাগল।

ফকির

উঃ !

~~চণ্ডী~~

ঐ তো, সন্ন্যাসীর সুখভ্রুংখবোধ আছে তো ! . মাথায়
হুকোর জল ঢালি তবে, মাথা ঠাণ্ডা হোক ।

যষ্টী

আহা, কেন ওকে বিরক্ত করছ, ভাই । সাত বছর পরে
ফিরে এল, সবাই মিলে আবার ওকে তাড়াবে দেখছি ।
মাখন, ও ভাই মাখন, আর দুখু দুখু দিস্ নে— একটা কথা
ক, নাহয় ছুটো গাল দিলিই বা !

ফকির

আপনারা আমাকে মাখন বলে ডাকছেন কেন । পূর্ব-
আশ্রমে আমার যে নাম থাক্, আমার গুরুদত্ত নাম
চিদানন্দ স্বামী ।

সকলের উচ্চহাস্য

চিন্ত

ওরে বাবা, ত্রাণকর্তা এলেন আমাদের । দেখ্
মাখ্না, ত্রাকামি করিস নে । ভাবছিস, এমনি করে
আবার ফাঁকি দিয়ে পালাবি ! সেটি হচ্ছে না ; তোর ছুই
বোয়ের হাতে ছুই কান জিম্মে করে দেব, থাকবি কড়া
পাহারায় ।

ফকির

গুরো, হায় গুরো !

তুই দ্বীপ প্রবেশ

প্রথমা

ঐ যে গো, মুখচোখ বদলিয়ে এসেছেন আমাদের
কলির নারদ ।

ফকির

মা, আমি তোমাদের অধম সন্তান, দয়া করো আমাকে ।

স্রবলে

এই এই, করলে কী ! .প্রাণের ভয়ে মা বলে ফেললে ?

প্রথমা

ও পোড়াকপালে মিন্সে, তুই মা বলিস কাকে !

দ্বিতীয়া

চোখের মাথা খেয়ে বসেছিস, তোর মরণ হয় না !

ফকির

একটু ভালো করে আমাকে দেখে নিন ।

প্রথমা

তোমাকে দেখে দেখে চোখ ক্ষয়ে গেছে । তুমি
কি খোকা নও, নতুন জন্মাও নি । তোমার ছুধের দাঁত
অনেকদিন পড়েছে, তোমার বয়সের কি গাছপাথর আছে ।
তোমা'য় যম ভুলেছে ব'লে কি আমরাও ভুলব ।

দ্বিতীয়া

নাক মুচড়িয়ে দিয়ে

সাক্ষীকে বিদায় করেছ নাকের ডগা থেকে । তাই
ব'লে আমাদের ভোলাতে পারবে না— তোমার বিট্লেমি
ঢের জানা আছে । ওমা, ওমা, ঐ দেখ্ লো ছুটকি—
সেই তালের বড়ার ধামাটা ।

প্রথমা

তাই রান্তিরে গিয়েছিলেন ভূত সেজে বড়া খেতে !

দ্বিতীয়া

চকোত্তিমশায়, এই দেখে নাও — মিন্‌মে- রান্নাঘরে
চুকে এনেছে বড়াসুদ্র আমাদের ধামা চুরি ক'রে ।

সকলের হাস্ত

কান্ন মণ্ডল

সে কি হয় । যোগবল, ভাঁড়ার থেকে উড়িয়ে এনেছে ।

ষষ্ঠী

ওগো বৌদিদিরা, কেন ওকে খোঁটা দিচ্ছ । ঘরের
বড়া ঘরের মানুষই যদি নিয়ে এসে থাকে তাকে কি চুরি
বলে ।

প্রথমা

ভালোমানুষের মতো যদি নিত তবে দোষ ছিল
না— মা গো, সে কী দাঁতখিঁচুনি । আমার তো দাঁতকপাটি

লেগে গেল ।

ষষ্ঠী

ভাই মাখন, এটা তো ভালো কর নি— গোপনে
আমাকে জানালে না কেন । তালের বড়ার অভাব কী ।

ফকির

গুরো ।

দ্বিতীয়া

কলার ছড়ার বাকি অংশ তুলে ধ'রে

এই দেখো তোমরা । ভাড়া রেখেছিলুম ব্রাহ্মণভোজন
করাব ব'লে । সকালে উঠে আর দেখতে পাই নে ।
দবজাও খোলা নেই, ভয়ে মরি । আমাদের এই মহাপুরুষের
কীর্তি । কলা চুবি করে ধর্মকর্ম করেন !

ষষ্ঠীচরণ

মহাক্রোধে

দেখো, এ আমি কিছুতেই সহিব না । এই ডাইনি
ছুটোকে ঘর থেকে বিদায় করতে হবে, নইলে আমাব
মাখনকে টেকে পারব না । দেখছ তো, মাখন ? কেবল
ভালোমানুষি কবে দুই বোকে কী রকম করে বিগড়িয়ে
দিয়েছ !

ফকির

সর্বনাশ । আপনারা সাংঘাতিক ভুল করছেন ।

আপনাদের সকলের পায়ে ধরি— আমাকে বাঁচান ! হে
গুরো, কী করলে তুমি ।

ষষ্ঠী

না ভাই, বেকবুল যেয়ো না । ধামাটা তুমি ওদের ঘর
থেকে এনেছিলে, কলার ছড়াটাও প্রায় নিকেশ করেছ ।
সেটাতে তোমার অপরাধ হয় নি— তবে লজ্জা পাচ্ছ
কেন ।

ফকির

দোহাই ধর্মের, দোহাই আপনাদের— আমি ধামাও
আনি নি, কলার কাঁদিও আনি নি ।

ষষ্ঠী

পষ্টই দেখা যাচ্ছে খেয়েছ তুমি । কেন এত জিদ
করছ ।

ফকির

খেয়েছি, কিন্তু—

বামনদাস

আবার কিন্তু কিসের !

ফকির

আমি আনি নি ।

সকলের হাস্ত

পাঁচু

তুমি খাও তালের বড়া, দেয় এনে আর-এক মহাশ্মা,
এও তো মজা কম নয়। তাকে চেন না ?

ফকির

আজ্ঞে না।

সিধু

সে চেনে না তোমাকে ?

ফকির

আজ্ঞে না।

নকুল

এ যে আরব্য উপাশাস।

সকলের শাস্ত

ষষ্ঠী

যা হবার তা তো হয়ে গেছে, এখন ঘরে চলো।

ফকির

কার ঘরে যাব ?

প্রথমা

মরি মরি, ঘর চেন না পোড়ারমুখো ! বলি আমাদের
ছটিকে চেন তো ?

ফকির

সত্যি কথা বলি, রাগ করবেন না, চিনি নে।

সকলে

ঐ লোকটার ভণ্ডামি তো সহ্যবে না। জোর করে নিয়ে
যাও ওকে ধ'রে, তালাবন্ধ করে রাখো।

ফকির

গুরো।

সকলে

মিলে ঠেলাঠেলি

ওঠো, ওঠো বলছি।

মুন্সীর

বৌ ছটোকে এড়াতে চাও তার মানে বুঝি; কিন্তু
তোমার ছেলেমেয়েগুলিকে? তোমার চারটি মেয়ে, তিনটি
ছেলে, তাও ভুলেছ নাকি।

ফকির

ও সর্বনাশ! আমাকে মেরে ফেললেও এখান থেকে
নড়ব না।

গাছের গুঁড়ি আঁকড়িয়ে ধ'রে

কিছুতেই না।

হরিশ উকিল

জান, আমি কে? পূর্ব-আশ্রমে জানতে। অনেক
সাধুকে জেলে পাঠিয়েছি। আমি হরিশ উকিল। জান?
তোমার ছই স্ত্রী!

ফকির

এখানে এসে প্রথম জানলুম ।

হরিশ

আর, তোমার চার মেয়ে তিন ছেলে ।

ফকির

আপনারা জানেন, আমি কিছুই জানি নে ।

হরিশ

এদের ভরণপোষণের ভার তুমি যদি না নাও, তা হলে
মকদমা চলবে বলে রাখলুম ।

ফকির

বাপ্ রে ! মকদমা ! পায়ে ধরি, একটু রাস্তা ছাড়ুন ।

ছই স্ত্রী

যাবে কোথায়, কোন্ চুলোয়, যমের কোন্ ছয়োরে ।

ফকির

গুরো !

হতবুদ্ধি হয়ে বসে পড়ল

হৈমবতীর প্রবেশ ও ফকিরকে প্রণাম

ফকির

লাফিয়ে উঠে

এ কী, এ যে হৈমবতী ! বাঁচাও, আমাকে বাঁচাও ।

প্রথমা

ওলো, ওর সেই কাশীর বৌ, এখনো মরে নি বুঝি।

মাখনকে নিয়ে পুষ্পর প্রবেশ

মাখন

ধরা দিলেম— বেণুজর। লাগাও হাতকড়ি। প্রমাণের
দরকার নেই। একেবারে সিধে নাকের দিকে তাকান।
আমি মাখনচন্দ্র। এই আমার দড়ি আর এই আমার
কলসি। মা অঞ্জনা, কিঙ্কিয়ায় তো ঢোকালে। মাঝে
মাঝে খবর নিয়ে। নইলে বিপদে পড়লে আবার লাফ
মারব।

পুষ্প

ফকিরদা, তোমার মুক্তি কোথায় সে তো এখন বুঝেছ ?

ফকির

থুব বুঝেছি— এ রাস্তা আর ছাড়ছি নে।

পুষ্প

বাছা মাখন, তোমার মস্ত সুবিধে আছে— তোমার
ফুটি কেউ মারতে পারবে না। এ ছুটিও নয়।

দুই স্ত্রী

ছি ছি, আর একটু হলে তো সর্বনাশ হয়েছিল !

গড় হয়ে প্রণাম ক'রে

বাঁচালে এসে।
